

# INUIT ATAQATIGIIT

## INATSISARTUNI



Ittoqqortoormiit, 25. november 2011

Inatsisartut suleriaasianni § 37 naapertorlugu matumuuna imaattunik Naalakkersuisunut apeqquteqarpunga:  
(Inatsisartuni ilaasortaq Juliane Henningsen, Inuit Ataqatigiit)

### **Apeqqutit:**

1. 2012-imi sanaqateqarluni illuliornermut aningaasaliisoqassava? Taamaasappat qanoq annertutigisunik?
2. 2010-miit maannamut sanaqateqarluni illuliornermut soqutiginninnerup annertussusaa qanoq nalilerneqarsinnaava?
3. 2012-imi aningaasanut inatsisissap suliarineqarnerani paasinarsivoq nunaqarfiit avinngarusimasullu sanaartornermut tunngasunik najoqqutassiuunneqarnerat utaqqineqarsimagaluartoq taamaatinneqarsimasoq, Nunap Immikkoortuini Inuussutissarsiornikkut Pilersaarummut ilanngunneqarluni suliarineqalersimammatt, taamatuttaarlu nuna tamakkerlugu sanaartornikkut periusissaq tamakkiisuussasoq siunnerfigineqarmat. Nunaqarfiit avinngarusimasullu tassani qanoq suleriuseqarluni ilanngunneqassappat?

### **Tunngavilersuut:**

Aningaasanut inatsit 2012 pingajussaaneerneqarmat nuannaarutigisatsinnik sinerissami sanaartornissamut aningaasaliissutit amerlipput. Piffinni illoqarfiit anginerit sisamat avataanni sanaartornissaq killeqarmat, illuliortiternermut isumaluutissatsialaapput medbyggerhus-it, sanaqateqarluni illulianik taaneqartartut. INI A/S-illi nittartagaani taakkununga tunngasut qupperaanni allaqqavoq 2010-mi sanaqateqarluni illuliornermut aningaasaliisoqanngitsoq, ima allaqqavoq:

“Sanaqateqarluni illuliortarnermik aqqissuussineq 2010-mi aningaasaliiffigineqanngimmat, ukioq 2010 tamakkerlugu tapiissutinik akuersisoqassanngilaq. Ineqarnermut, Attaveqarnermut, Angallannermullu Naalakkersuisoqarfik nalunaarpoq, ukioq mannamut aningaasaliisoqannginneranut peqqutaasoq, nunaqarfiit avinngarusimasullu pillugit sanaartornermut najoqqutassiorneq utaqqineqartoq.”

Nittartakkami nalunaarutigineqartoq tamanna pisoqalisimasoq atuisunut paasisutissiiingilaq, paaserusunnarporlu 2012-imi periarfissat qanoq ittuussanersut.